

Ժողովուրդը ապրել է, կեանք է վարել շնորհիւ իր արհեստների, նրան պահպանել է միմիայն աշխատաւորութիւնը—գիւղատնտեսութիւնը: Սուլթան Սուլէմանի օրով, Իբրահիմ փաշայի (Հայ տէրտէրի որդի) կազմակերպած տարազների կերպան ու ձեւը Հայ արհեստաւորի շնորհքն էր, որոնք որպէս նորաձեւութիւն փոխադրուեցան Եւրոպա 1530ին: Օսմանեան պետութեան ամենազլխաւոր որմաղիրները, խալֆաները (ճարտարապետ), ղինագործները—Բայբուրդից էին, ամենաընտիր ենիշարական դաշոյնը եւ սիփայիների շէշխանները Բայբուրդցիներն էին պատրաստում: Եւրոպական մեքենական արտադրութիւնները իսկեցին Հայ արհեստաւորների վերջին պատառը եւ նրան կործանեցին:

Ճորոխի Աւաղանի բնական բերքերի հարստութիւնը—անտառները, պղինձը, ոսկին, արծաթը, երկաթը եւ պողպատը բնակչութեան առաջնորդել է զարգացնելու երկրագործութեան հետ զուգընթացաբար արհեստները: Այս երկրին կից Կոլա, Արդահան, Չլդըր (լճի շուրճը), Ջաւախք, Վանանդ, Բասեն ու Կարին գաւառների բնակչութիւնը դաժան կլիմայի պատճառով դարուն, ամառ եւ աշուն աշխատել է չարաչար. իսկ ձմեռը պառկել ու կերել է. այնինչ Տայեցին ձմեռը մտել է անտառ, սարքել է իր ճախարակը, տախտակ է ձեւել, սնդուկ է շինել. կաղ-